

Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it



Domenie ai 5 di Març la Societât Filologjiche si da dongje in assemblee *Puartâ il patrimoni culturâl simpri plui dongje dal Friûl e dai furlans*

Puartâ dongje simpri di plui il patrimoni culturâl de Societât Filologjiche al Friûl e ai furlans. Al è chest, in struc, il messaç fundamentâl de assemblee de Societât che si fasarà domenie ai 5 di Març a lis 10.30 a matine in Palaç Mantica, sede di Udin in vie Manin 18.

L'apontament cu la assemblee al è un moment impuartant par fâ un balanç, no dome economic, da la ativitât dal sodalizi ma al è ançe une ocasion par mostrâ ai socis, e plui in gjenerâl a la comunitât furlane, lis iniziatis che la Filologjiche e à puartât indevant tal 2022 e chês in program pal 2023. Tai ultins agns la nestre storiche istituzion culturâl si è impegnade par meti a disposizion dai furlans contignûts simpri plui multimedîai, sedi par cui che al è a stâ in Friûl ma ançe pes comunitâts tal forest. In cheste prospettive, par esempi, si inricjîs simpri di plui il sit des Rivistis Furlanis (www.rivistefriulane.it): tal 2022 si son zontâts i "Studi Goriziani" e tal 2023 e jentrarà ançe la riviste "Bisiacaria".

Ma a inressin ançe i fonts fotografics (cu lis fotografiis dal cjapitani Oreste Bugni su la Vuere

Grande tal Gurizan, chês di Pellis a Flumisel, il font da lis cartulinis e no dome), i documentaris etnografics (cul font des ricercjis etnografichis Ciceri Pellis) e si è daûr a digitalizâ inmò di altris articui e publicazions che a saran cjamâts cui catalics in linie de Societât.

Dutis chestis iniziatis a son dentri de propueste di fâ sù "vetrinis digjitâls" che a sedin a disposizion ançe des altris istituzions culturâls furlanis che a podaran cjatâ tai catalics de Filologjiche une vetrine, apont, par fâ cognossi al public chest grant patrimoni. In plui di meti a disposizion il so patrimoni culturâl, la Societât Filologjiche e je impegnade ançe inte produzion di contignûts gnûfs: tra chescj, i cors di formazion a distance pai docents des scuelis furlanis, organizâts dal Docuscuele (Centri di Documentazion Ricercje e Sperimentazion Didatiche pe Scuele Furlane), e pal public in gjenerâl, cui cors pratics di lenghe e culture furlane che a viodin inressi simpri di plui interes e partecipazion.

No dome, la assemblee e sarà ançe la ocasion par presentâ ai socis lis gnovis peadis a la aplicazion de

normative sul Tierç Setôr: di fat, dopo di un percors lunc e complès, la Filologjiche e je jentrade intal Registri unic nazionâl dal Tierç Setôr.

Propit in atuazion des normativis sul no profit e dai risultâts une vore bogns, chest an la documentazion de assemblee si inricjîs di un document gnûf: il Balanç Sociâl, un imprest fundamentâl pe "rendicontazion" no dome economiche e finanziare des ativitâts de Societât.

Cun di plui, in assemblee si presentaran i apontaments pal 2023: tra chescj, la edizion numar 10 de "Setemane de Culture Furlane", che chest an si davuelzarà dai 18 ai 28 di Mai e si sierarà cu la tradizionâl "Fraie de Vierte" a Prepot, e il Congrès sociâl, che al sarà il numar 100 e si lu fasarà a Montreâl domenie ai 15 di Otubar. Ai 23 e 24 di Novembar in Cjasa Ascoli a Guriza si fasarà la cunvigne "I 150 anni dei Saggi Ladini. Il pensiero di Graziadio Isaia Ascoli tra storia e attualità": al sarà il prin apontament di un program trienâl di cunvignis tal Gurizan in preparazion dal grant apontament pe Capitâl Europeane de Culture 2025.

Cuâl avignî pai rapuarts jenfri furlans e slovens?

Cuâl avignî pai rapuarts jenfri furlans e slovens? Di chest e di tant altri si à fevelât intal incuintri promovût de Akademija Špacapan in colaborazion cu la Societât Filologjiche, che si è tignût in "Cjasa Ascoli" a Gurize sabide ai 25 di Fevrâr.

A fevelâ di chest argoment a son stâts Ferruccio Tassin e Peter Černic, che intun plasevul incuintri a àn menât il public presint e chel colegât a distance a cognossi la storie de colaborazion tra lis dôs comunitâts lenghistichis dal Gurizan.

Si à vût fevelât dal Votcent, cuant che in graciis de intuizion dal guvier imperiâl al è stât rinfuarçât il rûl des minorancis in ducj i teritoris dai Asburcs e in cheste situazion une funzion fundamentâl le àn vude lis istituzions di formazion dai predis, no dome tai 'seminaris ma ançe a nivel centrâl, tal Frintaneum, une scuele di alte formazion par predis a Viene. E jere una rispueste multilenghistiche al mît romantic dal stât nazionâl che e jere la fonde des

*Incuintri promovût
de Akademija Špacapan
in colaborazion
cu la Societât Filologjiche a Gurize*

rivoluzions dal 1848. E in cheste cundizion la nestre Arcidiocesi di Gurize e faseve scuele: no dome tal 'Seminari ma ançe te ativitât pastorâl indulâ che predis furlans a jerin in paîs di lenghe slovene e predis slovens a jerin in paîs di lenghe furlane.

In cheste situazion a son vignudis fûr no dome personalitâts tant che Faidutti, Zecchini, Sedej e Fogar ma ançe une base culturâl e di rispjet des minorancis che e à puartât a la colaborazion, ançe politiche, jenfri catolics furlans e slovens. Une situazion che e je lade indenant fin a la fin dal Imperi e po, cuant che e je rivade l'Italie e dopo cualchi an il regjim fassist, chest piçul mont al è finût cu la proibizion dal ûs des lenghis diviersis di chês taliane.

E po, dilunc de seconde vuere, si inseris la storie dal cjamp di presonie par internâts civîi slovens a Visc, atif jenfri il 1942 e il 1943: une storie inmò pôc cognossude che e merete di jessi fate cognossi. Di agnorums Tassin al puarte indevant la valorizazion dal cjamp di Visc, cul sium di meti sù inte strutture un centri di documentazion sui cjamps di presonie in Italie e un centri di educazion a la pàs. Ringraciant il Signôr chei timps a son passâts e cumò al è timp di tornâ a fevelâsi tra furlans e slovens e, duncje, ançe occasions di incuintri e di confront come chês promovude de Akademija Špacapan a son di preseâ e di pocâ: dome fevelant e colaborant si podarà tornâ a meti dongje une prospettive pal avignî dal Gurizan.



FERRUCCIO TASSIN (A MAN ÇAMPE) E PETER ČERNIC.